



## საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

### მონეტა

მონეტა (ლათ. moneta), სხვადასხვა ლითონისგან მოჭრილი ფული, რომელსაც აქვს განსაზღვრული ფორმა, წონა, სინჯი და ღირებულება. თავდაპირველად სიტყვა „მონეტა“ იყო ქალღმერთ იუნონას ერთ-ერთი ეპითეთი და ნიშნავდა დამრიგებელს, მოძღვარს. სახელი მომდინარეობს კაპიტოლიუმის ბორცვზე (ქ. რომი) იუნონა-მონეტას ტაძრისაგან. როდესაც ძვ. წ. 275 რომის რესპუბლიკამ დაამარცხა ეპირის მეფე პიროსი, მთელი ნადავლი ტაძარს შესწირეს და იქ ფულის მოჭრა დააკანონეს. **მ.** გაჩნდა ძვ. წ. VIII–VII სს. მიჯნაზე ერთმანეთისაგან დამოუკიდებლად ძვ. სამყაროს ორ პუნქტში – მცირე აზიის სახელმწ. ლიდიაში (ელექტრუმის – ოქროსა და ვერცხლის შენადნობი) და საბერძნეთში კ. ეგინაზე (ვერცხლი). სახელდება ეგინაზე **მ**-ის მოჭრის თარიღი – მალევე, VIII ოლიმპიადის (ძვ. წ. 748) შემდეგ. მ-ს 2 მხარე აქვს: შუბლი (ავერსი – Av.) და ბურგი (რევერსი – Rv.). ავერსზე თავსდება გამოსახულება, რ-საც საკანონმდებლო ფუნქცია აქვს. მასზე გამოსახული ღვთაება, შემდეგ მონარქი, იმპერატორი, რესპუბლიკის ან ქალაქის სიმბოლო ამა თუ იმ **მ**-ს ბრუნვაში აკანონებს და მისი სრულფასოვნების გარანტიას იძლევა. ბურგის იკონოგრაფიას გამოსაცნობი ფუნქცია აკისრია. მისი დახმარებით დგინდება მ-ის მოჭრის ადგილი (სახელმწიფო, ქალაქი). ადრეარქაული **მ**-ები ცალმხრივია, ე. ი. გამოსახულება მხოლოდ ერთ მხარეზეა ამოტვიფრული, მეორე მხარეს კი ჩაღრმავებები აქვს, რ-საც კვადრატულ ინკუბუმი (quadratum incusum) ეწოდება. საწარმოს, სადაც **მ.** იჭრებოდა, ბარაფხანა ეწოდება, ხოლო ორგანოს, რ-ის პრეროგატივაა **მ**-ის ემისია – ემიტენტი. **მ**-ზე მოთავსებულ გამოსახულებას და წარწერას – ლეგენდას (ზედწერილი), რ-იც ამა თუ იმ სახელმწიფოს ან კლასის ინტერესებს, იდეოლოგიას გამოხატავს, სამონეტო ტიპი ეწოდება. მისი საშუალებით ადგენდნენ **მ**-ის მოჭრის ადგილს, დროსა და ნომინალს. სახელმწ. სამონეტო ერთეულად იღებს განსაზღვრული რაოდენობის (წონის) ლითონს და მათ განსაკუთრებულ სახელებს არქმევს [დრაქმა, იჭრებოდა აგრეთვე დიდრაქმა, ტეტრადრაქმა, დეკადრაქმა, ჰემიდრაქმა და სხვ. (ვერცხლი, ძვ. ბერძნ.); სტატერი (ოქრო,

ძვ. ბერძნ.); დენარი (ვერცხლი, რომი), აურეუსი (ოქრო, რომი); მილიარესი (ვერცხლი, ბიზანტია), სოლიდი, ნომიზმა (ოქრო, ბიზანტია); აღმ-ში ვერცხლის: სიკილა (აქემენიანთა ირანი, ძვ. წ. VI ს-იდან), დირჰემი (VI-XIV სს.), თანგა (თემურ ლენგის დროიდან), აბაზი (სეფიანთა ირანი), აყჩე (ოსმალეთი); ოქროსი: დარიკი (აქემენიანთა ირანი), დინარი (სასანიანთა ირანი და არაბთა სახალიფო), ალთუნი (ოსმალეთი); ევროპაში: ტალერი (ვერცხლი), ფრანკი (ოქრო, ვერცხლი), მარკა და სხვ.]. ძვირფას ლითონს სიმტკიცისათვის გარკვეული რაოდენობით ურევდნენ სპილენძს, რასაც ლიგატურა ეწოდება. **მ**-ის შემადგენლობაში კეთილშობილი ლითონის ნაწილს სინჯი (სინჯადობა) ჰქვია. დასაშვებია შეფარდება 9:1. საეტალონო ერთეულიდან სინჯისა და წონის კანონით დასაშვებ გადახვევას რემედუმი ეწოდება, რ-ის მკვეთრ გადახრას **მ**-ის დემონეტოზაცია, ანუ მიმოქცევიდან ამოღება მოსდევს. **მ**-ს, რ-ის მსყიდველობითი უნარი შეეფარდება მასში შემავალი ლითონის ღირებულებას, სრულფასოვანი ეწოდება. ზოგჯერ **მ**-ს გადაკრული აქვს ოქროს ან ვერცხლის თხელი ფენა, მისი გული კი ტყვიისა ან ბრინჯაოსი. მას სუბერატულ, პლაკირებულ **მ**-ს უწოდებენ. ყოველი ბარაფხანა გარკვეული წონის ლითონით (ოქრო, ვერცხლი) მარაგდება და ვალდებულია მისგან სტანდარტული წონის გარკვეული რაოდენობის **მ**. დაამზადოს. ესაა სამონეტო რიგი. **მ**-ს მოჭრის მონოპოლიური უფლება - სამონეტო რეგალია - როგორც წესი, სახელმწიფოს ეკუთვნის. თუ **მ**. რაიმე ისტ. ფაქტის ან სხვა ღირშესანიშნავი მოვლენის აღსანიშნავად იჭრება, იგი მემორიალურია (სამახსოვრო), ხოლო თუ მისი ფუნქცია რომელიმე პრივილეგირებული წრის ან პირის დასაჩუქრებაა - დონატიური. ზოგიერთი სამონეტო ჯგუფი საერთაშ. (ინტერლოკალური) მნიშვნელობას იძენს. ანტ. ხანაში ასეთი იყო ალექსანდრე მაკედონელის სტატერი და ლისიმაქეს სტატერი. საქართველოს ტერიტ-ზე **მ**-ის ემისია ძვ. წ. VI ს-იდან დაიწყო (იხ. კოლხური თეთრი) და 1834-მდე გრძელდებოდა. რადგან პირველი მონეტა მსოფლიოში ძვ. წ. VII ს-ში მოიჭრა, ხოლო ისტ. კოლხეთის ტერიტ-ზე სამონეტო ემისია ძვ. წ. VI ს-იდან დაიწყო, ამ გარემოების გათვალისწინებით საქართველო სამონეტო ცივილიზაციის ერთ-ერთ უძველეს კერად არის მიჩნეული. რამდენადაც **მ**-ის მოჭრა მხოლოს სახელმწ. უფლებაა, საქართველოს სახელმწიფოებრიობა ძვ. წ. VI ს-იდან იღებს სათავეს.

**მ**-ის შესწავლას დიდი მნიშვნელობა აქვს ამა თუ იმ ქვეყნის პოლიტ.-ეკონ. და კულტ. ისტორიის საკითხების გასაშუქებლად. იგი წერილობით წყაროებთან ერთად მნიშვნელოვანი დოკუმენტია და ვინაიდან **მ**-ს ემისია სახელმწ. კომპეტენციაა, იგი სახელმწიფოებრივი მნიშვნელობის საბუთია და მას იურიდ. ძალა აქვს. **მ**. ობიექტურად ასახავს ისტ. მოვლენებს და ზუსტად გადმოგვცემს ფაქტებს.

ქალაქის ფულის შემოღებასთან ერთად **მ**-ის, როგორც გადახდის საშუალების როლი მკვეთრად დაეცა. განძის მნიშვნელობას ინარჩუნებს მხოლოდ ძვირფასი ლითონებისგან დამზადებული **მ**-ები. XX ს. **მ**. ქალაქის ფულთან შეფარდებით საყოველთაოდ არის ხურდა ფულის ნიშანი პირობითი კურსით. ოქროსა და ვერცხლის **მ**-ებს იშვიათად უშვებენ და სერიოზული ეკონ. მნიშვნელობა არა აქვთ. მეტწილად ეს **მ**-ები სამახსოვროა (ან საიუბილეო).

ლიტ.: დუნდუა გ., ჯალალანი ი., ქართული ნუმისმატიკური ლექსიკონი, თბ., 2009; დუნდუა გ., დუნდუა თ., ქართული ნუმისმატიკა, 1; თბ., 2006; კაპანაძე დ., ქართული ნუმისმატიკა, თბ., 1969; ჯავახიშვილი ივ., ისტორიის მიზანი, წყაროები და მეთოდები წინათ და ეხლა, წგ. 3, ნაკვ. 3 - ქართული საფას-საზომთამცოდნეობა ანუ ნუმისმატიკა-მეტროლოგია, თბ., 1997 (თხზ. 12 ტომად, ტ. 8).

**გ. დუნდუა**

---